

白
華
後
稿

白華後稿卷之十九

南滙吳省欽沖之簣

男敬樞星宰
敬沐起元校字

跋二

恭擬 勅封忠義神武靈佑大帝冊文跋後

記曰庸言之謹謹慎也故語曰敏於事而慎於言自下達上之文表末稱謹拜表以聞或有所進御稱謹隨表上進以聞或有所專遣稱謹遣某官臣某奉表以聞啓稱謹奉啓事以聞或止稱謹啓彈事稱謹奉白簡以聞露布稱謹遣某官奉露布以聞狀曰謹狀對策曰謹對應試論議曰謹議謹論昌黎集學生代齋郎議文苑本

有謹議字不貳過論一本有謹論字元濟南潘氏行文
凡例尙多未備也今章奏之末曰謹題謹奏屬官白事
於其長曰謹稟至平行及下行文移皆不用謹字故事
人臣撰進代言之文於所尊者曰謹上尊號曰某某謹
上尊諡曰某某餘神祇嶽瀆曰其勅封爲某號某神乾
隆戊子四月省欽撰進是文依仿舊式曰其勅封爲忠
義神武靈佑大帝比發出

上丹筆改其字爲謹

字敬神神在寸私惕然昔王仲舒廉問江西昌黎爲袁
州刺史所下牒當曰故牒仲舒以昌黎巨賢特自換曰
謹牒昌黎申狀請如舊制鄭志趙商問弓矢一條鄭云

謹荅文選魏文帝與鍾大理書云謹奉賦一篇鍾爲魏
臣趙爲鄭弟子其詞固有從謙下者省欽於擬撰之作
概不敢存存此以紀 聖學之閎與敬德之至盛云爾

爲周光鏞跋其五世祖原博茂才詩牘

明景泰十才子以長洲劉溥原博主盟後吳文定公亦
字原博與王文恪領袖朝野一時名士特盛文貞憲稍
後出及其門者王伯穀亦揔持三十餘年若周先生又
稍後焉先生諱埏其字原博殆慕劉吳之爲人有非止
名字相配已者好讀書其書秀媚有骨力見

欽定佩文齋書畫譜是卷金石盟一則載鑒藏書畫數

十種多係名跡可以見其得力之自其四十初度詩較
俳注云擬袁師中郎袁以萬歷二十年進士知吳縣喜
與士流談藝先生籍諸生當在弟子之列然他詩雅則
多異此荅張伯起札以張舉竹窗竹山相比謝不敢居
張好填詞梨園子弟多演之卽先生詞可知當省試病
脹長子留句容候學使錄利遣力走問因寄札至家言
二三童子飽飯取快狀較少陵久客親童僕句更悽惋
又一札叙己酉中秋橫塘泛月事虎邱詩亦署己酉是
爲萬歷三十七年越明年而錢謙益鍾惺成進士惺撰
詩歸謙益撰列朝詩選及初學集有學集逐臭如狂今

昔奉勅禁毀先生之詩若文不錄於二家與他本所選而澤流五世處晦克昌是固其後者賢抑亦鬱積之理之有以自致也夫

萬壽千字文跋

梁千字文有二其一蕭子範爲南平王製王命記室蔡選爲之注其一武帝擇王羲之書一千字襍碎而不重者使周興嗣韻之舊唐書志列子雲所撰千興嗣之前而隋志周興嗣撰一卷蕭子雲注一卷子雲乃子範弟必不注興嗣本且子範或就興嗣本更互爲之理有然也劉後邨見祕閣帖有漢章帝書百餘字皆興嗣語遂

以千字文非梁人作過矣千字者興嗣傳謂集王羲之
書太平廣記謂武帝令殷鐵石擇大王書宋李至傳謂
集鍾繇書陳書沈衆傳梁武製千字詩衆爲之注解其
卽今千字文與否無從論證而智永歐陽詢懷素張旭
諸人大書行世進士周述重加改次冠以天寶應道句
將進請頒行會時相詰以枇杷二字如何翻破述逡巡
不能對而止然枇與杷本義可破惟興嗣女慕貞潔純
扇團絜不重字而重義固不能無議焉乾隆四十五年
庚子伏遇

皇上七旬萬壽吾編修弟省蘭改次興嗣本恭進乙覽

復自爲注釋大經大法標舉燦如昔侍其璦避興嗣所用之字別製千言黃庭堅謂當與急就凡將並行而御製詩注文徵明每旦寫千文一通世有日寫千文者乎願以此文請

皇十一子臨絳帖跋

乾隆乙巳夏 皇十一子扈

烈於避暑山莊疎簾清晝出絳帖倉頡夏禹至柳公權薛稷木依次臨摹爲材縑素高句驪紙爲體大小篆八分真草七十有三家爲卷十二裝示省欽謹盥手系之跋曰宋淳化祕閣帖十卷其材或云棗或云石或云南

唐昇元帖以匱紙李廷珪墨搨者爲祖石或云閣帖卽
祖石自二王府帖大觀太清樓帖紹興國子監帖淳熙
脩內司帖臨江戲魚堂帖利州帖黔江帖卷數悉與閣
帖同惟仁宗朝劉丞相沆長沙帖私第帖長沙碑工帖
並尙書郎絳州潘師旦舜臣手刻帖皆析閣本爲二十
卷以已見去取增損陳振孫所云絳民潘氏帖者也舜
臣析石授二子其長子以上十卷償官錢絳守摹下十
卷配之是爲東庫本其幼子亦摹上十卷配成一部是
爲私本又有新絳本比本武岡舊本新本烏鎮本福清
本本皆二十卷其轉輾仿刻之資州本彭州本蔡州本

止有上十卷若曹氏格古要論所載絳本十二卷以孔子倉頡秦漢魏人書爲第一宋名賢書爲第十二歲久石缺崇慶初節度使高汝礪補之又補入顏魯公諸帖與右所臨本固以不合與王弇州所見之十二卷首卷倉頡夏禹至秦漢人二卷章帝至唐高宗者亦異且弇州就逸少頭眩一帖據東觀餘論斷爲潘刻然墨池編於傳模條下列頭眩一帖是頭眩帖固不止潘刻也矣是故以絳帖爲心能轉腕手能轉筆者黃庭堅也以爲北紙北墨極有精神者王佐也以爲比今閣帖精神過之者曹士冕也以爲古法清勁足正王著肉勝之失然

未免羸瘦者陳繹曾也以爲未見真蹟祇從閣本摹出
正如寫篆者不見人而摹遺象即使神骨果勝去真益
遠者孫鑛也善乎洪景盧之言曰碑刻不必問所從來
但以書之工拙爲斷如曹氏王氏論列之十二卷不云
殘本卽云不知所出右本刻者無可考而臨摹並用神
采蘊發如揖古人於千百載之上其中虞伯施卽時帖
帖蹟嘗藏省欽所甲申秋故大學士劉文定綸購入內
府發編相對宛如素識自餘可意推矣上下五百年縱
衡一萬里此墨寶非墨妙也乾隆五十年十月日

跋張文敏堂帖

教授一經成舊學起居八座荷新綸此吾郡張文敏題
錢塘梁谿父先生堂帖也先生受吾師文莊封仕不就
文莊鼎侍 龍樓故帖云云戊寅春予謁師里第見之
己亥甲寅乙卯三典浙試訪山舟侍講見之如故丁巳
臘按試津門見竹香大尹所鈎勒則佚其行首之稱信
所謂下真蹟一等者文敏幼從先曾祖存初府君學設
師榻遶榻倍文若翻水小竝則口吟蓋得知者之動非
直其書絕倫卽尋常酬應語亦盛得水佳如此

跋出火大集方廣經

予有黃庭經用細筆間如髮香光定爲唐臨本使蜀時

得梓州琴泉出火大集方廣經可二千言與所見時出
火之妙法蓮華經殘葉署前蜀王鱸祥書者工拙不同
昔座師秦文恭家藏靈飛經蹟得自海寧陳氏皆屬血
裔是卷用筆略肥試按九宮法弱一絲鉤之與黃庭經
唐臨本略寬一絲上石豈非雙璧

跋祝選樓所裝予手牘并其婦翁紆亭太守簡
札

往癸未春予始識紆亭嗣紆亭與子弟稷堂同教習

咸安宮官學同試授國子監學正相得甚懽兩家眷屬
幼穉還往雖先後子姓不啻也閱數年紆亭辭內就外

令宜興又數年移銅山以書再告曰倉庫所儲素懼醜
毒銅固望縣柰積累逾十萬何行殉矣會黔西李公以
川督調兩江入覲遇諸朝語及江蘇時弊予曰銅山令
到官三月積累且十萬紆亭謁李公公曰遠具各前任
侵虧若干某若干克期以報不數旬各累一清不至興
大獄在紆亭初不料發自予也玉潤遜樓年少而文予
已亥典浙闈旣薦被落而遜樓嗜予詩文不去口癸亥
春其次郎來攝婁簿手一冊示予則予致其冰玉簡牘
也予書拙豈敢望藏弃之榮乃覆審再三無一不出已
手無一悖禮害道之語此素心所差可用自慰耳抑選

樓惓惓之誼與紆亭先子物化之感歲月不居重使人
感不自勝也

堦上海喬淦玉繩覆校

白華後稿卷之二十

南滙吳省欽沖之簾

男敬樞星宰
敬沐起元 校字

墓碑 墓表一

誥授通議大夫例授資政大夫兵部侍郎湖南

巡撫都察院左副都御史查公神碑

乾隆五十七年夏桂林查太守淳以卓異來 覲攜其
先中丞公銅鼓書堂集四十卷使爲序而青浦王侍郎
昶將以脫橐乃文其隧道之碑以矯一書兩序之非以
表其志行名義之大有國史未獲詳而例得附集後見
者予壻於查於公故疏屬而先後處九年中又間相見

知我愛我雖密戚無復過者其何忍碑其何忍不碑公
諱禮字恂叔一字儉堂先世自臨川遷京師占籍宛平
明季甲申之變一門七婦女同時自焚樓上廂諱

父諱

俱以公貴贈通議大夫四

川布政使司布政使祖母 氏母馬氏生母王氏俱贈
夫人王夫人佐通議公筦家政家日起而所產皆自乳
有別館在天津禺筵殷盛購書數萬卷公自少寢饋其
間與伯兄孝廉爲仁仲兄淮南運判爲義遞主壇坫東
南名下士翕習景附故未冠而跽跼集成一時都爲斂
服嗣後敷歷中外以風雅爲性命以友朋爲職志雖後

進中媿固如予而不以迹合雖簿書填委戎馬匆促不以一日廢事卒不以一日廢書廢詩非所謂知之好之而樂之者耶公以戶部主事授廣西慶遠府理苗同知薦卓異擢太平府知府請終母養未抵家而宅憂痛含殮之不違也服除二年始就部補四川寧遠府知府擢川北道旋調松茂道遷按察使布政使皆治四川其擢湖南巡撫則乾隆四十七年九月年六十九矣臘望入覲屢被召對命以明年正月二日赴官二十五日薄病二十八日復趨朝奏對如平常退而與故人飯二十九日丑鐘鳴肅衣冠戒行忽痰湧端坐而逝

知與不知舉太息以謂未竟其用也公神采岸異談吐如洪鐘在部未一年雲南請簡發丞倅辦軍需冢宰陳文肅公以公應將發小金川平乃發廣西修靈渠考湘灘二水之源建黃文節祠於慶遠建書院試院於太平成都城三十餘里每夏潦水汨汨入民居行者亦病公審其高下鑿宿土自二三尺至七八尺街路寬坦水竇豁如不三月而役蕺當金川之再叛也制府阿公以公得夷情奏請調松茂旋奉 旨專督西路糧運將軍

溫公請以公兼運北路糧請以公釐小金川戶口地糧屯政巡撫鄂公請以公安設北路宜喜糧站木果木戒

嚴公時駐美諾急調兵往救抵喇嘛寺寺站已破途次
擒二賊而餘賊攻八角碉甚危美諾不能守乃退守達
圍凡二十日夜鬚髮爲白今大學士將軍阿公復進兵
請以公闢楸底至薩拉餉路路成制府富公請以公駐
楸底督西北二路餉金川平留辦屯務先是果羅克番
民吹斯枯爾拉布坦劫青海商民騾馬制府文公請以
公往按而富公請以公赴宜喜控綽斯甲三雜谷士兵
乃不果行至是果羅克復有刼殺之事文公再請以公
往以太守時令宜賓所以西北路軍需責其銷核先發
兵五百人出紅橋關公至關而撤使歸檄三雜谷士兵

四千裏糧會松關下於是中果羅克土司麻克蘇爾衮
布來謁論以速跡賊當上爾功踰月不獲遂分兵四出
並檄上下果羅克索之復不獲公收兵結營召麻克蘇
爾衮布責曰爾數賊當同賊罪吾若縱爾必上煩天討
吾不忍爾爲兩金川之續也檻之行始吐賊所在擒之
麻克蘇爾衮布至郾而斃自是三果羅克無敢劫殺者
是役也閱時百餘日不勞一官兵不費一官錢予時視
蜀學問公何以服諸番之心而盡其力公言番衆利我
鹽茶第如額市之而弗故以輕重應役勤者雖賤無弗
賞悞者雖貴無弗懲嘗以四日成猛固橋當昏暮抵梭

木土司請止礪舍卒不許而以其知大義資之其後撥馬所兇番刼殺裏塘沙塘寺僧公單騎往按土兵皆爲偵伺獲噶克朗忠二人置之法今廓爾喀之役其寇不無藉口雖遠隔衛藏非果羅克裏塘比然使公在而咨度其間則所以播聲靈明要約而防患於未然者當必有道矣豈不惜哉公雖席富厚而不問家人產又周急若不及以故日益絀惟鼎彝書畫及古銅印千百顆常列座右訪升庵故址築室談讌拓藩署小園曰亦園暇輒集僚幕及書院諸生賦詩自遣每日與其家中築室不若署中築室旣爲公廨誰其棄之若子孫不肖去之

直做屣耳去蜀時令家屬緩程東下俟到官而後舟泊
長沙其嚴整多類此公之葬三河馬昌營也以乾隆五
十年六月日元配李夫人繼李夫人皆附其次子五長
卽桂林府知府淳次泳早卒次潛前廣東海豐縣縣丞
次法候選刑部司獄後公卒次濤太學生次溥女三長
適候選教諭楊華次適太學生 次適 孫五孫

女六曾孫一公宣力金川史官能覈其實而果羅克之
役章奏簡略無從采摭故就所見備書之爲籌邊者告

閔處士墓表

廣濟閔貞僑漢口頃自京師歸寫余真泣然曰貞十二

歲而孤追寫父母真輒失其似寫他人卽真執藝三十
年一日薄暮就肆浴一浴者偃僂聲欬酷似父掩涕斜
睨之未暇訊姓名忽不見時時跡浴肆焉閱年餘闐然
遇諸道則襍縷一老農強與暱而飯極歡貌以示素識
父者無不太息也欲貌母憶兒時搏泥被呵走反擲所
搏泥泥跳塗母面貞驚蹠奉母面亟拭之母面目宛然
在也偶一嫗來乞漿貞詫曰是矣致之樓並狀之而置
櫝饋食以爲常故貞又有奉饌圖士夫多以詩若文記
其事其父墓之表與志作者且三人焉雖然貞有所以
請公者貞父生康熙甲子距今凡百年今二月貞設象

張具墓所或以貞非禮然古得祭墓墓又貞父所自相也貞先世居南昌青石橋稱東閔支祖舜邦四傳至廷柏廷柏生時應時應生會會字雲涯以輩行名應會後避名止曰會行賈遷武穴被戕於鄱湖之盜婦王亦隱悸卒遺孤止半歲卽貞父處士君諱德裕字瑞玉一字崑岡者也會有友沈君意周之美程在謀互爲鞠養稍長程以謂可教妻以女裝齎千金夜績朝吟顧影閨默旣乃習龍砂八六之學一笠一杖走方千里內故家墓兆與其原野谿谷衰旺得失之故作圖以証諸古成堪輿一貫四十卷瀕卒謂貞曰汝母先我卒汝雖穉必以

母弟幼病癘斥美產界之通籍十六年未四十而不復
出矣當作令初程中丞元章欲以和州薦而制府尹文
端公以公爲會闈所舉士引嫌不果泊雷州 命下

尹公又請公辦六安賑積至勞疾未嘗有幾微見詞色
其詩沖淡樸至一如其爲人不惟得之師友切劘已也
嗚呼以公進之蚤而退之如此其勇脫從容敷歷何遽
不至大僚乃涉歷世情詠風終老論其詩者徒想象之
華星秋月之間非有命存耶抑不欲以彼易此耶公以
康熙四十二年九月十九日生乾隆二十九年正月十
九日卒年六十有二配胡恭人繼劉恭人又繼劉恭人

子葵求表者也次蔚次藻皆邑庠生女五人皆適士族
孫 鳳齡 孫女一

邱孺人李氏墓表

往子自黃州絕樊港涉西山瞰武昌縣若仰孟縣之東
八里曰蓮花山縣人邱元鳳之母李孺人藏焉元鳳生
三歲而孤其弟元鵬甫一歲先是元鳳高祖仲明家累
萬金生具瞻具瞻惑葬師言遷窆其祖子桂花園旣窆
具瞻歿子建侯彰侯匡侯相繼歿惟建侯遺二子有瑜
有璜有璜殤有瑜終二十五歲卽孺人所天也有瑜旣
少孤爲博徒誘且病且博盡鬻所有田比卒遺租入田

五斗孺人襁二子以十指課薪水子稍長課以讀讀與
機聲夜相荅食稍給以其贏贖三四斗租存贖至五六
石元鳳食以醫元鵬亦入太學親黨將爲請旌典孺
人曰未亡人向未殉者以孤在耳敢希名乎今夫子葬
已久吾酷于先世之禍吾死幸別葬而毋發夫子墓蓋
十七而嫁二十二而寡八十一而卒卒之日乾隆四十
二年十月十日其明年十二月十日則葬日也嗟乎合
葬之禮古矣雖孔子不以爲非周家人墓大夫掌公墓
邦墓無不辨其尊卑度數而葬以其族自漢志五行家
有堪輿金匱十四卷形法家有宮室地形二十卷而葬

書于是乎起予若孫怵於利害禍福之說有累世不獲葬者此司馬溫公所由奏禁天下葬書張无垢律葬巫以左道也然賢如朱子猶一再遷葬而迄於分葬以謂計久遠安寧特不可計富貴利達耳孺人重懲前禍以計其久遠安寧不同穴而不悔不重可悲歟元鵬子齊益以廩生優行貢太學爲予言孺人嫠居後母家有婚喪始往往不日輒歸旣老手未嘗不紡績鄰不能舉婚喪者未嘗不竭以力此不足爲孺人特書書遷葬之害與有瑜之幼而見誘敗家以亡其身以見孤子之窮而因以見孺人之撫其孤以成爲難也有瑜葬栗嶺距孺

人墓東十里其女夫楊瑞梅黃岡廩生孫三齊益齊震齊望曾孫四

例贈文林郎廩膳生羅君墓表

門人上虞羅際隆貌古而學樸今齒五十餘矣落會試
亟歸侍母養且爲父謀葬焉蹙然言曰親未有善而誣
之罪也親有善而遺之亦罪也曾南豐以歐陽公誌其
祖報書以謂若輩之淺薄滯拙而先生進之先祖之屯
蹇否塞以死而先生顯之生之陋奚敢以言南豐而先
人之遇之困有甚于南豐之祖願得一言而死且不朽
也予遜避不獲按狀表之曰君諱羽豐字習齋先世自

慈谿徒虞之永豐鄉曾祖某祖某父枚先以諸生爲邑
都講從遊者百數十人年五十餘而舉君君五歲誦小
經輒曉其大義六歲能賦詩時試士未用詩君浸淫於
漢魏六朝三唐之製學使金壇于文襄公雷公鉉寶公
光鼐皆遇以國上闡試輒失意顧無怨尤意方辛未丁
丑春

慈慶覃治

天子省方吳會東南金箭之彥懷握鉛槧希慕 恩寵
者不可以數計君荒江授館力不能以名上而發抒忠
孝雍容揄揚其迎 鑾頌賦播在人口方七歲上冢經

破岡畝風雨驟至舟將覆諸子姓爭跳岸冀免且挈君
上君以父年老且久痺號泣持父踵願偕溺水水灌舷
濺冠纓終不動須臾風止十七歲而孤事母袁生母朱
負米輒十數里自館穀外一介不苟取主福山書院十
餘年礪礪文行嘗誡諸子曰利達有命惟讀書當爲好
秀才力田當爲上農夫而已其讀書多有特見論小大
雅皆以其辭爲區別小雅不可爲大雅大雅不可爲小
雅猶之風不可爲雅雅不可爲頌論孔子誅少正卯事
雖不見經傳爲後儒附會而有口誅筆伐之義論呂后
殺韓彭以其名歸之帝而異日可恣吾所爲論崔實政

論爲管商之流此論出而鉤黨禍烈漢隨以亡論蔡邕
墓不當在虞邑論邑志梁處仁軼事爲不經予間從際
隆所見君鷹峯集論錄若此君以康熙辛卯十月二十
日生乾隆壬午八月二十五日卒配陳子三人長際會
塲季際時際隆其仲也乾隆己亥舉人揀選知縣雖葬
君未有期而君之志與學足使善者勸也於其行書以
爲表

塲上海喬淦玉繩覆校

白華後稿卷之二十一

南漚吳省欽冲之纂

敬樞星宰
敬沐起元校字

墓表二

勅授修職郎溧陽縣學教諭贈中憲大夫日講
起居注官翰林院侍讀學士韋公墓表

乾隆四十七年十月二日燕湖韋祭酒謙恒葬其先公
於邑之楊家場嫡妣甘夫人妣周夫人祔焉越五年祭
酒告省欽曰甘夫人歿於我生以前周夫人歿五十年
先公歿三十九年而始葬非敢緩也先公治命於楊家
場距軒盤山祖墓近必贖而壙之顧煢然數十年無與

謀迨謙恒節祿人求贖於某而某固距前年春某轉鬻
於沈沈與謙恒有連始斥宅畀弟震蒙舉事竈以館師
劉文定預爲之文而請省欽表諸道按公氏韋諱前謨
字儀哲宋深道先生諱許者自江西隱蕪湖構寄傲軒
見蘇子瞻李端叔周少隱陳了翁集其遷祖也贈吏部
考功司郎中鄉飲賓一教其曾祖也吏部考功司郎中
嗣賢其祖也新鄭縣知縣贈 日講起居注官翰林院
侍讀學士聖功其考也贈恭人古氏其妣也贈翰林院
編修天棟乾隆丁卯舉人天棟癸未賜進士及第今國
子監祭酒前貴州布政使護巡撫印務謙恒縣學生震

蒙履泰鼎復其子也縣學生成龍其後第五弟者也太
學生胡光緒巴州知州沈德馨縣學生江朝品其女子
夫也孫十人其聞者甲午舉人今河間縣知縣協夢今
保定府通判協中也公承世詩禮自少督其弟八人於
學鄉試五薦不遇雍正元年序資授泗州訓導七年外
憂去十年起金壇訓導又九年遷溧陽教諭又二年歸
卒以祭酒官內閣中書翰林院侍讀學士時累贈如其
官與偕學者稱鐵夫先生其在泗州督學孫文定公按
部廉楊生內行劣將斃之公以楊三世無支子告杖釋
而楊不知公去泗楊走送百餘里泣曰父母今愛我微

夫子皆不知死所矣金壇丁生與馬生讐馬夜袖金曰
丁武學生得以他故褫更相報公拒而導之讐亦解王
生弟卒於武城令孤殤痘丹徒陳生誣王殺姪覬產賂
教授轉賂公牒諸縣公力拒而教諭獨上其事事白武
城家已破後教授客死教諭暴病死瀕死輒呼王武城
于某等童試赴鎮江旗校陷以犯夜禁幾致衅公以利
害陳主帥得解公嘗言讀書務達於用泗州蝗募民數
獲而計其直不日蝗盡遇賑微服瀾民間察之民以爲
神此已足以著公矣其大者則泗州減賦裁衛利濟逮
今實自公發其端焉初泗有淤地涸地賦胥吏因緣爲

奸何副使宗韓檄公履其事公奏記曰泗編戶五十三

里今淤地十三里

實丈一畝曰小畝

千七百餘頃涸地五十一

里

實丈五畝爲一畝曰大畝

千四百餘頃淤則升科涸則復額其條

銀歸潼安衛徵收此重糧賠糧所自也重糧者一地兩

糧旣報淤復報涸也黃水由睢寧桃源宿遷來決州境

朱家海順流而下十三里停泥深者數尺淺亦尺餘其

接睢桃宿境者地勢高沃宜麥宜豆秫是爲上等其次

地稍窪麥收後雖播晚禾潦汎易沒難必有秋是爲中

等又次者黃水下注力弱不能挾沙而行蘆葦叢生不

可耕垡漲則巨浸漲過猶復沮洳是爲下等三者皆係

淤地於康熙四十一年報過水沈酌減條糧者也論現在情形應入新淤不應仍復舊額論水沈舊地應歸涸出不應另報升科且涸且淤豈堪並賦惟一丈明其浮出者以新淤升科其餘仍作涸出歸淤十三里十三里中有向係高岡捏報水沈亦有舊報拋荒今經墾熟者亦宜另行履丈歸入涸案分上中下三則任土作貢則田賦適均無一地兩糧之患矣賠糧者有糧無地報涸而實未涸者也州境報涸二十一里自十三里淤地外餘三十八里城垣尚在水中場市亦歸河伯所報涸出特前張牧空談紙上耳然謂無所涸出則又不然蓋

前報水沈有虛有實報沈之始河督有朝廷不與小民
爭尺土一語於是奸胥猾佃冒沈邀豁及涸出例起遂
報涸以杜訐控如青四青九諸里本在腹地原未水沈
如淮安諸鄉果沈水底難令包賠應歸涸冊又仁一仁
二諸里附近湖河爾宅爾田久爲蛟窟里民或思占籍
因報留條糧少許此輩捕魚刈葦已同泛宅現在或任
輸將日後難免逋匿故必通行履勘分別水沈之虛實
實者悉予豁除則無無地有糧之患矣夫淤涸兩案夢
如亂絲今之冊籍不清由向之經界不正康熙十八年
大水灌城三十五年四十四年疊罹水患冊籍漂失所

報水沈曾未履驗不過冊造某里免一二分某里免六七分業戶條糧卽以所免分數爲準是故民間買賣不著頃畝但曰田一分半分糧若干受業者苟不知地畝之縱衡弓數之多寡而欲造冊之官吏瞭如指掌能乎且雍正五年淤地新冊牽簷筐丈爲數略有可憑至涸地一冊則張收憑空結撰是以五十三里中涸者五十里而其間或半涸或全涸涸與不涸憑之蠹胥之手爲今日計先分里次分戶責保甲督同業戶各將弓口丈明然後官爲掣丈孰淤孰涸一見了然人耕有賦之田不輸無田之賦此永世計也抑潼安衛駐白洋河適

桃睢宿泗虹之中編氓輸賦朝而衛夕而州縣計其資
費以之輸條銀而有餘況呼應不靈考成交累誠裁衛
而以所徵責諸州縣不特泗虹受福卽睢桃宿胥受其
福省欽之碑何副使也知其丈量淤涸之事而不知發
之於公乃副使封土河岸記里記戶以杜詭弊時公已
去泗不及覩故公自跋丈量議謂雍正十年十月見邸
報始知末議采行減州府糧七千餘漙安衛亦裁併入
州縣大府爲民請命與

聖天子勤恤民隱之至意如此嗚呼序貢之齒暮矣又
久之而始授官祿少位卑其談藝者已尠何況經義何

況治事以公之學行閎實於物利濟非所云天之報施不於身必於子孫者哉故述其大者著之石

淤地十二里涸地五十一里共六十三里而先生言
泗編戶五十三里當由州編原戶五十三里先沈後
涸者五十一里其淤地十三里殆卽由朱家海順流
而下之十三里分上中下三等者也涸而復額僅欠
二里淤而升科頓增十一里所以有重糧賠糧之累
也

文林郎寧波府儒學教授存齋周君墓表

海寧由縣升州州洛塘周氏出宋營道元公公八世孫

太常卿嗣原扈高宗南渡七傳至職方郎宣殉德祐之
難孤肇允家焉十餘傳至學舒郡庠生奕康熙辛卯舉
人鴻魁邑庠生贈文林郎是爲君之曾祖祖父也曾祖
母祖母母皆朱氏君諱大業字致堂號存齋其生也不
逮見祖考而曾祖母旌表節孝朱孺人猶在堂撫之曰
爾祖讀書累行未獲報後當有興者其在是乎故小名
興祖甫就傅所業倍他兒贈君痰且喘每作叱君退使
毋輟業君起居惟謹卽怒撻不敢離未冠師邨塾以資
養甲戌冬贈君挈君試郡城小極忽喘劇痰上湧而歿
是日君扃試不及屬纊隱痛終其身自是君大小試贈

君輒入夢夢怒必失夢喜必得嘉興李太守星曜爲其子若媚擇師衆曰無如君者君已壯未籍諸生且居贈君喪韋素人見李未之奇也居數日忽嘆曰此經師抑人師矣閱五年李起守同州建書院亟聘君主院十邑之士來學者百數十人同之文爲之一振李遷川東道去促君至徐州課其子若孫李故宮保敏達公子所至皆曰能然負氣惟於君久而加敬嘗謂曰吾服官以來治行粗可紀君知之也稔而又工於文吾死必爲之狀故李終於湖北鹽道而君狀之李築堂曰課耕思以志不在溫飽榜其楹而對若不屬一日以屬君君曰盍增

二字爲平生志不在溫飽而以方寸地留與子孫對之
蓋不特屬對工切而其與人交不外乎直諒多聞者類
如此己亥秋予於鎮海令今陝西按察司使周君房中
獲君卷決其爲宿學明年春君來謁言其同祖弟廣業
卷亦且雋以三場卷不到落是夏君成進士予語君就
教職便養母毋耽耽簿領舍所長而用所短然君之涖
寧波也學舍久廢據尊經閣以居乃申請所司借月奉
以治堂寢士有負累不得白者輒直之枉者隳括之脫
一旦綰符百里歲計非不足者其教諸生與爲山長無
異其爲山長與爲塾師無異屬纊之日僚長至諸生會

者數百人而廣業子勲懋勲常皆師君君同懷弟建業亦在署侍養其母孺人廣業懼今後之無以爲養無以爲葬君而詣予告歸且預請所以表君墓者嗚呼是俱足以風矣君以雍正五年十一月十四日生乾隆五十二年二月二十七日卒年六十有一配陸孺人子勲元邑庠生女二一字邑庠生唐叔封一未字孫桂芳增壽封登仕郎四川蒼溪縣典史附監生俞君墓表同邑俞君西源以乾隆五十一年十一月終距生康熙四十七年七月日年七十九矣君之先故蜀人明龍游縣知縣國憲罷官家焉曾祖有亮國學生遷上海之周

浦今爲南匯縣境祖克昌邑庠生父誠母陸孺人孺人
彊記誦君襁褓時卽耳古人言行塾師授舉子業意不
屑也其籍博士弟子在我生之初而嘗與予同館江寧
應鄉試予以戊寅六月至都入中書直君遂主予家明
年夏予挾元夫人櫬歸君以揅衍咀吮之術名動公卿
者二十年有所得隨手輒盡故人邑子落拓不得食者
輒就君君故貧舌耕爲業當乙亥吾郡大饑請賑

命未下君倡輸二十緡請邑令勸富人賙其里里抄捐
瘠君坐是益困不得已而與其子廷選人都廷選尉蒼
溪時予視學在蜀君先以馮廉使廷丞之聘在臺灣至

是就廷選養居五年與子一相聞嗣子視楚學試宜昌
君歸舟泊峽口不得見見君手致書言將依福中丞杭
州幕府覽西湖之勝歸老浦上聞飲啖如少年墓草久
宿而其孤再三乞表予其能已於言耶君父老疾每五
鼓籲以身代居陸孺人憂幾毀兄蒼文病瘳爲養兄及
嫂無力而竭其力故人以爲難嘗語人曰吾子人非好
爲施也不啻其不得已耳君諱必達字日夜一字西源
葬邑之十九保十九圖子一卽廷選女一適庠生徐廷
和孫二孫女四

誥封朝議大夫工部營繕清吏司郎中候選州

同邱君墓表

吾門邱侍御文塏奉其府君與母單恭人之喪返錢塘度地卜葬而預乞表隧之文按狀君諱倫字明五一字樸菴系出南齊祭酒靈鞠其後人遷河南之祥符宋建炎初左正言乾扈行臨安因家焉十八傳至茂學是爲君曾祖祖諱維鏐父諱渭馳贈朝議大夫母鄔氏贈恭人君上有兩兄年十六隨伯兄之京師入族祖通州藥肆居四年外內艱相繼訃君哀痛不欲生又無以謀葬日夜擘畫淚痕漬枕席殆遍又五年單恭人來歸日益刻苦刀圭呿咀之學亦日精遂居京師又六年傾貲而

南塋二親于法華山之半里亭族人淺厝者十三棺同
日下窆而伯兄歲附糧艘一至京師聚首爲樂又七年
伯兄訃至卽日買舟下以仲兄子爲之後買宅議婚旣
天而恤其嫠倍至族黨中甚匱乏者雖未嘗相識必歲
致問遺嘗與族弟國子助教永輯邱宗信譜詳贍有法
文塏雖獨子而督教之甚嚴當單恭人棄世時文愷婚
僅逾月故嚴父而有慈母之愛文塏通籍後每啓事
西苑必先夕戒徒御具芻糗或僚友公讌歸雖丙夜猶
執卷以待乙巳春

上紹述千叟宴文塏掖君至

乾清宮

賜尙方珍幣

甚夥君成六言律以進蒙 選入千叟宴詩頒示中外
文塏官工部郎山西道御史時京察列一等者再例出
外以親老請留君輒爲語曰幸得躋八表汝侍養歸舊
里焚黃葺墓以紓畢生之隱蓋君居京師六十三年十
八年而生文塏又十九年而文塏引例籍大興縣爲博
士弟子比得第君趣令投牒歸原籍衆以北籍大小試
較利便疑君不復計其後而文塏之謀歸葬也或以錢
塘無產業不如擇近地安魂魄爲便乃準太公自周反
葬于齊之義毅然而行之夫豈不復計其後乃所以一
日不忍忘邱墓者其心不已諒哉君以康熙 十年

七月生乾隆五十四年五月卒候選州同 誥封奉政
大夫晉朝議大夫例贈中憲大夫掌河南道監察御史
配單恭人先二十八年卒累贈恭人子一卽文塏乾隆
辛卯進士掌河南道監察御史女一適候選縣丞沈灝
孫四嘉徵嘉祉嘉贊嘉玉女孫二曾孫二

誥贈朝議大夫例晉中憲大夫前進士孫公墓
表

公諱昇龍字漢章一字飛淵姓孫氏直隸懷來人雍正
元年癸卯舉於鄉乾隆二年丁巳成進士年三十六矣
既需次會咸安官需教習 命廷臣舉可爲學生師者

公與荐晨入暮出出舍馬生所是年九月遭痢卒渴葬於城北老君莊之祖塋孤思庭僅四歲越歲乙巳思庭守昭通贈公朝議大夫丁未冬思庭以薦來京泣然曰思庭從先恭人長外家舅氏故江西按察司副使源爲言丁巳會闈中與先大夫同號舍薄暮示所作四書義意甚得已而歎曰吾文雖必售無祿子福澤方盛脫交易其文而繕之吾其免乎榜發舅氏厠明通榜猶鄉試副榜也而先大夫果以不祿馬生者殯禮甚備先恭人每以爲難先恭人竭手口以爲養且教先王父王母之喪實負土焉他言行無可徵惟子之文冀以不朽嗚呼

親有善而遺之悖也未有善而諛之誣也雖有善不知而臆之亦誣也觀公之膺教習之薦與馬生之致禮于其師而行可知已觀公之自知與知人而學可知已觀思庭之不忍遺其親而又不忍誣其親卽母教與母德可知已思庭今遷福建鹽法道其子縉執業于予以予諾之久敦迫焉而表諸石公會祖繼志明天啓丁卯舉人陝西寧夏道副使祖一桂順治辛卯舉人山西陵川縣知縣父諱榮宗邑庠生貤贈朝議大夫妣蔣氏贈恭人配李氏四川重慶府知府厚望女及思庭之鄉舉而卒贈恭人女一適國學生閻樸孫二縉乾隆己酉拔貢

生舉人緯國學生曾孫三

壻上海喬淦玉繩覆校

白華後稿卷之二十二

南滙吳省欽冲之簒

男敬樞星宰校字

墓表三

誥封中憲大夫山西道監察御史例貢生吳公

墓表

常熟北門外五里盛家山有邱巋然爲封山西道監察御史吳公之墓其葬以乾隆五十五年二月日其卒先一年九月十四日距生年康熙丙申六月初五日春秋七十有四而先卒三十年之金恭人合葬者也公諱敬字文止一字種石系出唐左臺御史少微後祖國啓

太學生贈文林郎父諱宏祖廬貢生累贈中憲大夫祖妣金孺人查孺人妣查恭人中憲公自休寧世居之大斐遷縣城再遷昭文最後遷婁縣故諸孫皆占籍昭文而中憲公與公皆以錢唐之隸籍應闈試中憲公十薦不售與一時名下丙辰鴻博中徵士講德考藝公資稟既異濡染益深試薦顧亦不遇乃退督家事有弟十二人妹八人分置兩地間教養之以至昏嫁歲已亥江浙饑明年公仲弟慎旃歿中憲公忼直卞急多不諧於世而親族新舊貧交務愜其所欲離計又日誚公一手支拄者廿餘年中憲公始以爲竭其力蓋不敢以勞悴不

忍以支絀之狀告之親。蓼蟲甘苦庶幾養志而非直口體者。嗚呼難矣。公產雖日落而遇事億中以故家復起。乙巳旱。公請於有司以三連票法絕囤販輸米百石。倡常昭紳士飯餓者。又請籍餓者大小若干口。自需錢若干。又請釐虞山書院沙田官田。請以捐賑餘錢千緡。孳息以廩院舍諸生。却掃之餘一編不去手。手錄陞簡祕文累千紙。無一字譌脫者。其嗜學也勤。其練事也敏。仲子蔚光。自諸生時已負東南盛名。叔子熊光直軍機。十餘年早見信用。胚胎之而陶冶之。公于是無遺憾焉。公貌甚癯而氣體精悍。目炯然射人。先是甲辰春患急下。

夢中憲公呼而告曰吾痢死于補汝慎之累百人方待
汝養寤而劑以清利遂瘳至是病肺稍進參朮食日減
預決死期以處分後事人咸以爲異子四道光例貢生
蔚光庚子 恩科進士禮部候補主事熊光戊子舉人
壬辰內閣中書歷工科給事中藹光太學生女三長次
適附監生郭鉅三適山西布政司照磨姚鍾英孫十孫
女六曾孫五曾孫女四以子之族疏戚密而誼尤密也
旣哭之京邸之位又以公之行義人知之乃其隱微有
他人不能述者舉而筆之潸然不知涕之何從耳

誥封太宜人張母陳太宜人墓表

乾隆壬子冬石阡張仕廷需令江西將行請表其母陳
宜人之墓泣而言曰仕廷十五歲而喪我府君是爲乾
隆壬申之十二月初四日越七日我母爲葬之城南之
屏山我母長府君二歲時年三十五以庚戌二月八日
棄養於玉山辛亥五月十二日窆於府君墓後五十步
府君少攻苦以王父母先後棄世廢書食力彌留之頃
謂我母當何如曰義不獨生曰是挈諸子女殉我矣汝
固能守志然產薄累重仕廷當教之成我志在腹者男
也名之曰仕芳我母含荼茹藥旣貴如始嫠願賜之一
言而府君藉不朽焉按狀宜人父震母王命之習詩禮

歸贈奉直大夫張君之璧事舅姑能致其孝有市屋月
餼一金租入穀二十石既歿而用不給乃治屋後圃率
諸女夜績命仕廷兄弟以茱茹易雜糧或就塾易紙筆
以爲常郡守羅某嘗以夜三更過其門機杼聲與佔畢
相答遣人勞以粟帛表其門曰黃鵠貞操仕廷丞宛平
以 覃恩封母太宜人仕瑞亦舉孝廉時宜人所出徐
氏女從孫聖祥婦徐懋修婦陳皆蚤寡受宜人教曰婦
而節婦之不幸也然女子難得者名名節成天必有以
昌其後故易之象曰苦節曰甘節仕廷令德安宜人始
就養未至題一瓶酒以寄曰酒清若水汝不善飲與父

老共飲之邑之人皆爲詩以美仕廷獻新衣一襲則歎
曰今之粟帛何如嚮之敗絮雜糧民有父母衣食粟帛
者有幾以已之溫飽憇人之凍餒其如牧養何病革呼
湯拭颯夜半忽語曰汝父奉汝王母至汝等當拜見侍
女且揚旗勿鼓吹我笄而行矣詰旦顧諸孫扶起坐治
命井井遂瞑子四長卽仕廷乙酉拔貢今江西候補知
縣次仕驛太學生次殤次仕瑞己亥舉人候選知縣次
仕芳先卒楊芳宗徐丹山其壻也孫十四人長聖祐己
酉拔貢陝西候補直隸州判聖修郡庠生餘尙幼孫女
六曾孫一曾孫女四夫以婦道之難也年三十以下守

志者功令予旌而過此則格焉宜人之卒七十有五矣
拜封五品子孫淳貴孰與夫建坊之賜凡合葬止書夫
爵而不及婦人猶婦諡從夫之義古婦人有表志殆皆
異葬者今阡隴相望而表之以舉其夫之槩亦例之變
而起以義也況其實之無媿乎古賢母也若是歟

誥封奉政大夫例晉朝議大夫京畿道監察御

史歲貢生 內廷供奉雅堂沈公墓表

楓涇一大鄉鎮涇西治嘉善涇東治婁漁南市隱弦誦
相荅冠蓋亦相望方予入翰林光祿卿陳公孝泳時以
助教直 內廷祕文寶策多其甥沈君步垣爲勘正而

君尊甫雅堂亦以歲貢生獻詩畫

上親擢第一給事禁林每有所作輒稱

旨賜御衣錦綬荷囊筆墨果餌之品不勝紀歲庚寅圖
九峯三泖祝

萬壽第入上等藏石渠寶笈又嘗

御題繪林舊美字以旌之會步垣舉京兆試

諭曰爾子雋與爾獲雋無異

命以所落卷呈顧蒙

溫獎並

訓以百川灌河詩題大旨士林榮之竊以謂公苟傳遇

合視光祿必更優侍直八年顧目疾乞歸歸後十餘年
光祿歸道山步垣以翰林改比部郎迎養公與陳恭人
至京瞻首相莊膝下遶孫曾數輩鄉之人官於京者舉
以謂家之肥而人之瑞矣大命不延老成徂謝要于公
復何憾哉公諱映輝字朗乾雅堂其別字也系出吳興
六世祖海自長興始遷楓涇爲今婁縣地父諱源德國
子生贈奉直大夫刑部浙江司主事妣陸繼妣江俱贈
宜人奉直公以俗學浮夸命公十一歲而從平湖陸氏
增光遊九年學大進連遭大故二十五始籍學官弟子
其試郡縣皆第一後歲利試累高等爲桐城張少宗伯

博野尹少宰所器而省試輒落以資貢成均初學畫覃思未竟一夕夢老人授五色石啖之甚甘美握筆遂若神助富陽董文恪見公作謂曰君清曠無俗習畫法尙渾淪不尙破碎第腕運而弗令停卽得矣公深歎以謂卽活字訣又嘗論董文敏沈獅峯其畫秀在骨著虛白齋畫略二卷靜閒樓書畫記六卷自畫山水跋二卷賞心樂事一卷靜閒樓隨見錄二卷庚齋詩文存六卷子惟雲間派別素重藝林士大夫身際盛時必弼中而後有以褫乎外公鄉曲韋素受寵不可謂不榮而後祿之緩親見其子之上玉堂歷柏臺抑伊唔矮屋時所始願

不及者矣乃其撫伯兄之孤而竭誠于生事死葬之大者其內行尤不多見焉公以康熙五十六年十二月十四日生乾隆五十八年六月十七日卒年七十有七配陳恭人卽光祿妹也子二步垣乾隆辛丑進士今京畿道監察御史次厚壟早卒孫五人曾孫六人靈輒就絕將度地于其鄉之某原而表其墓以垂信

湯進士墓表

常熟爲吳望縣入我朝百餘年鉅公接武而陳先生祖范舉雍正癸卯會試未廷對而歸以經術薦受知籍國子監司業門弟子著錄甚夥予同年湯君從其

遊最久其出處學行多相似於五岳謂華嵩迭爲中岳則以國都於九河謂簡絜非必兩支聊以配數於職方九服謂特以分域而職貢仍以虞五服準之於肆師三夏謂詩九夏俱亡不得以時邁執競思文實之從而勝者疑以庶出非泛以姪娣燕於寢者爲路寢非廟後之寢闔人掌中門之禁當指宮中之門不指雉門澄酒在下當指粢醴之下不指堂下君卿大夫服麻冕士庶人服緇布冠異名而異制軾前橫木曰軛轂末曰軹曰軼亦曰軌異物而同名釜庾之庾爲量名鬲庾之庾爲器名今之籩爲古之簋今之簫爲古之箏絃如爵頭色在

赤與黑之間不得訓絳垤乃蟻封冢亦陰與雨之兆不
可牽鵲鳴豈父非太王名衛文非宣姜子菁莪箋五貝
爲朋漢志二貝爲朋則二貝猶兩尊之訓破斧傳木屬
曰鉶說文桀兩刃舌則木屬乃桀屬之訛西王母係國
名卽女直八百媳婦可証大宰讀如字與大司徒大司
馬相同司尊彝朝踐一節饋獻一節朝獻再獻一節文
倒而誤玉人先記圭次記璧次記穀圭簡錯而誤輪人
五分其穀之長長當作圍去三以爲軹軹當作軒其論
夏小正謂文雖古雅然雕琢過甚不類三代以上之書
且孟子夏后氏五十而貢無公田而經曰正月初服於

公田其疑一月令孟春昏參中而經亦曰昏參中時隔
千年以歲差法推之中星安得相同其疑二月令二月
桃始華五月木堇榮而經正月桃華二月堇榮時物違
異其疑三虞書仲夏火中則六月而流七月而伏矣經
五月大火中與虞書合而又曰九月內火大戴禮以火
爲大火則火豈至是始伏其疑四疑月令而信小正吾
未見彼失而此得也蓋君生具慧相舌端有川字文甫
就塾終日據案無旁睨年十一作九日登聚奎塔賦旣
從陳先生遊諸尊宿如方閣學苞蔣教授汾功顧祭酒
棟高皆折行輩上下其論議而又好學深思於經傳箋

疏必推勘其異同失得之故方會試入都時 詔舉經
明行修之士同邑歸昭簡公將以君應固辭成進士後
座主秦文恭公著五禮通考欲延爲參纂而以親老急
歸歸二年卒蓋乾隆乙酉年十月一日也距生康熙庚
子年九月初二日年四十有六諱愈字文起一字勉耘
先世居江陰至正末有孟吳者偕弟孟越遷常熟之石
橋圩代有顯仕若賢若洪若琛若繼文皆以科第進祖
本滌父諱之任居常熟析置之昭文遺田數十畝以好
施斥盡嘗病痢衾禡厠踰晝夜數十易君每自前滌里
入喪其妻將鬻女以殮君亟支館穀殯之得不鬻妹二

皆早寡一貧甚迎致而撫其出居京師先後十餘年遇
日蹇學日勤品日卓當君辭薦舉經學時齒未壯卽舉
未必偕先生擢司業卽四庫全書開館時君未歿必有
薦者然亦未必諧于世人以是惜君亦以是益重君君
耐石屋澗祖塋且二十年其孤學泰學祐學晟學箕學
裘等奉其母華碩人命請予表其槩爰擇其言之尤雅
者著之篇以告樸學者

中憲大夫銘茶吳君墓表

奉尺一之詔乘傳就道入鎖闥祇事胥行省之舉子而
進退之其雋者居弟子列稱恩門此儒臣之榮選終其

身不數遇也乾隆六十年乙卯五月吾家銘茶學士君
典福建試六月予典浙江試榜發聞君卒于甌寧驛館
其日七月二十六也君以乾隆四年十二月十六日生
予長君十年生辰亦先二日今嘉慶三年臘年七十矣
季弟宗人府主事孝顯來告是月二十一日耐君子金
山縣某字圩先墓而乞爲表表曰君諱樹本婁縣人乾
隆乙酉順天鄉試榜名昕辛卯舉會試改名敬輿最後
改今諱字芸閣一字貞生銘茶其別號也年十四後遭
父母及祖母喪十九以首選列博士弟子在翰林二十
五年當己亥予以試差名第一典浙江試而君名第三

典陝西試子視湖北學癸卯錄試貢監特置今侍讀學
士李君鈞簡超等第一越丙午而君典湖北試李遂領
解君在塾時結同社爲文會糊名質於余余置君第一
其詩文修潔有法度從沈明經大成遊備得其根柢大
成世所稱沃田先生有學福齋集五十卷行世者也分
纂一統志總纂南巡盛典分校四庫全書提調江浙三
分四庫全書學日續職日舉辛亥 御試翰詹諸臣以
編修超擢侍讀學士同日子弟省蘭以侍講超擢詹事
乃未周五載大命不延驛館蕭寥望空戀闕曾不若使
命未膺妻孥話訣而予亦得效寢門之慟也以君內行

之純舉兩世葬皆備禮以張氏姑有撫育恩官編修時
貤已封封其姑與張仲弟嗣宗病癰每旦顙叩額上腫
若瘤與孝顯官同邸出入每同車此余所以不能辭孝
顯之請而粗憶其涯畧如此君自定詩六卷文若干卷
曾祖元龍康熙己未博學鴻詞翰林院侍講祖廷揆康
熙癸巳進士歷翰林院提督四驛館太常寺少卿父諱
澄四品廕生累贈奉直大夫翰林院編修加三級祖妣
王氏先封淑人生祖母錢氏前母陳氏母宋氏皆贈宜
人娶王氏封宜人例晉恭人子男七人學韓學沂學范
學歐俱庠生學蘇學溫學潞俱業儒嫁太學生王九韶

者女子子也孫男五孫女二

贈奉政大夫翰林院庶吉士加六級顧公墓
表

省欽兒時先考嘗言以塾課故夫三桓之子孫微矣文
爲外祖顧公激賞許嫁以先妣比納采而公已先逝又
期而婚故言行多不詳公一子松早夭越五十年公從
弟希陶之孫祖功以序後松松葬所距公墓北半里許
皆在南滙之舊廿二圖字字號其部落曰趙老灣灣之
族顧爲大其習舉業自公始終公世籍博士弟子員者
數人公以康熙三十一年督學許時霖科試入上海縣

學第一時南漚未析治學額祇二十人其題硯硯然小
人哉是故知命者不立乎巖墻之下越雍正二年先考
入縣學時年二十二公卒爲十二月十七日而不詳其
年其生更莫以考然公之生當在康熙初始娶朱繼陸
繼沈沈嘗撫欽弟省蘭省蘭于乾隆四十五年官庶吉
士時請以已封貤贈公奉政大夫外祖妣皆宜人公諱
宏烈字丕承父芳陽妣丁孺人繼李孺人以節稱省欽
少入外家有督學李公振裕旌門曰畫荻齊芳蓋康熙
二十四年學道始改學院之歲也嘗收得雲間入泮同
登錄自順治二年提學陳昌言始試之官試之額試之

年試之題與試而售之姓名罔弗備載雖其家之子孫
莫能徵者舉於是乎徵抑以歎登科之錄百官有司題
名之記或傳或不傳曾禮部籍三年中歲科試新舊文
生兵部籍武生奚啻數十萬人而謂區區是錄足以傳
耶毛氏奇齡李氏紱皆論宗法旣廢盡人而立後者爲
非禮以公之開舉族文學身歿數十年獲膺五品之贈
祖功有重而承之不有異乎毛李所譏者也公四女長
卽先妣累贈一品夫人次適王汝泰次適吳瑛次適曹
子以不德謬躋通顯歸田後展謁墟隴自念二十四年
前以省蘭第三子敬樞爲後今七十二而始舉子敬沐

永言母德薄置墓田因祖功之立石不敢以不文諉也
於是乎書

塋上海喬注玉繩覆校